

Otsailaren 21ean GARIZUMAKO 1. IGANDEA

Agurra

Bihotz-berritzera dei egiten digun Jesu Kristoren grazia eta maitasuna zuekin.

Sarrerako oharpena

Berrogei eguneko ibilbideari ekin genion joan zen asteazkenean, hautsaren ezaugarriarekin. Goitik behera berritzeko aukera dugu aldi honetan. Jainkoaren Hitzaren argitan eta Eukaristiaz aberasturik egiten dugu aurrera. Igandea ospatzeak, Kristoren heriotza eta piztuerari begira jartzen gaitu, horretan gozatzen baita gure fedea, gure gizatasuna.

Misterio handi honek lagun diezagula gure bizitzako basamortu eta lehorteetan fedearen argia aurkitzen.

Damu-otoitza

Senideok: Jainkoak ez du bekatariaren heriotza nahi, baizik bihotz-berri dadila eta bizi. Ospakizun honen hasieran, jar dezagun geure uste osoa Jainko Aitagan eta dei egin diezaiozun:

—Jesus Jauna, uraren eta Espirituaren bidez / jaiotza berria eman diguzuna: erruki, Jauna.

—Jesus Jauna, gure barruan bihotz berria sortzeko, / Espiritu Santua bidali diguzuna: Kristo, erruki.

—Jesus Jauna, betiereko salbamena ekarri diguzuna: Erruki, Jauna.

Erruki dakigula Jainko guztiz ahaltsua, eta, gure bekatuak barkaturik, eraman gaitzala betiko bizira.

Otoitza

**Jainko ahalguztiduna,
egizu, Garizumako urteroko jarduerak eraman gaitzala
Kristoren misterioa hobeki ezagutzera
eta berari dagokion eran bizitzera.
Zurekin eta Espiritu Santuarekin batean
Jainko eta errege bizi baita gizaldi eta gizaldietan.**

Hitzaren liturgiari oharpena

Jainkoaren eta gizon-emakumeon arteko harremana, seme-alabatzakoa da, eskaintza-harremana da, askatasun-harremana. Jainkoak era neurrigabeen bere adiskidetasuna erakusten digu Itunaren bidez. Bera da konprometitzen lehena, guri erantzutea tokatzen zaigu.

Lehenengo irakurgaia (*Has 9, 8-15*)

Hasiera liburutik

Egun haietan, Jaungoikoak hau esan zien Noeri eta honen semeei: «Hara, ituna egiten dut zuekin eta zuen ondorengoekin, baita zeuekin dituzuen bizidun guztiekin ere: hegazti, abere eta lurreko piztiekin, ontzitik atera eta lurrean bizi diren guztiekin. Hona, zuekin ituna eginez, ematen dizuedan hitza: ez duela uholdeak berriro bizidunik hondatuko, ez dela aurrerantzean izango lurra suntsituko duen uholderik».

Jainkoak esan zuen gainera: «Hau da zuekin eta zuen artean bizi diren bizidun guztiekin belaunez belaun eta betiko egiten dudan itunaren ezaugarria: neure ortzadarra ipiniko dut hodeietan, eta hura izango da lurrarekin egiten dudan itunaren ezaugarria. Nik zerua lainotzean, ortzadarra agertuko da hodeietan, eta oroituko

naiz zuekin eta bizidun guztiekin dudan itunaz, eta ez da izango gehiago bizidunak suntsituko dituen uholderik».

Erantzun-salmoa (Sal 25 [24], 4-5. 6 eta 7cd. 8-9)

Lei - a - la za - ra zin - tzo - e - kin, I - tu - nagor-
de du - te - ne - kin.

Azaldu niri, Jauna, zeure bideak,
erakutsi zeure bidexkak.

Gida nazazu zeure leialtasunean, eta irakatsi,
Zu baitzara nire Jainko salbatzailea. R/.

Izan gogoan, Jauna, zeure gupida eta maitasuna,
betidanikoak baitira.

Gogoratu nitaz zeure maitasunean,
zeure ontasunari dagokionez, Jauna. R/.

On eta zuzen da Jauna,
bidea erakusten die bekatariei.
Apalak zuzenbidez daramatza,
bere bidea erakusten die apalei. R/.

Bigarren irakurgaia (1 Pe 3, 18-22)

San Pedro Apostoluaren lehenengo gutunetik

Senide maiteok: Kristok heriotza jasan zuen bekatuengatik behin betiko, errugabeak errudunengatik, zuek Jainkoagana eramateko.

Gizakia zenez, heriotza jasan zuen, baina bizia hartu zuen berriro Espirituagandik. Espirituaren eraginez joan zen bere mezua hots egitera giltzapetuak zeuden espirituei, garai batean sinesgogor izan zirenei; Noeren egunetan, hark ontzia egin bitartean, Jainkoa pazientziaz egon zitzaien zain; baina ontzian banaka batzuk bakarrik, zortzi lagun guztira, izan ziren uraren bidez salbatuak.

Ur hura orain zuek salbatzen zaituzten Bataioaren irudi da. Eta Bataioa ez da gorputzeko zikina garbitzea, baizik eta Jainkoari kontzientzia garbia eskatzea, Jesu Kristoren piztueraren bitartez. Jesu Kristo, zerura igo ondoren, Jainkoaren eskuinaldean dago eta menpean ditu aingeruak, aginteak eta indarrak.

Ebanjelio-aurreko gorapena (Mt 4, 4b)

Je - su-kris- to gu - ri min-tza, ar - gi gu-re bi-ho - tza

Gizakia ez da ogiz **bakarrik** bizi,
Jainkoaren ahotik ateratzen den hitz guzti**tik** baizik. R/.

Ebanjelioa (Mk 1, 12-15)

Homiliarako argibideak

Jesusekin basamortuan

Jar diezaiogun arreta Ebanjelioaren hasierako esaldiari: «Espirituak basamortura bultzatu zuen Jesus». Garizumaren hasierako dei garrantzitsu bat du. Jesusen mesias izatea agerian jarri berria zen Jordanen, berri ona pobreengana eramateko, bihotz zaurituak

sendatzeko, erreinua iragartzeko. Baina ez da presaka hasi eginkizun horretan. Alderantziz, Espiritu Santuaren bultzadari jarraituz, basamortura joan da, berrogei egunez, barau eginez, otoitzean, hausnartuz, saiatuz. Hori guztia bakardade eta isiltasun sakonean.

Historian zehar, basamortura erretiraten den Jesus imitatzea aukeratu duten gizon eta emakume asko izan dira. Ekialdean, San Antonio Abadetik hasita, Egiptoko edo Palestinako basamortuetara joaten ziren; Mendebaldean, hondarrezko basamorturik ez zen tokian, leku bakartietara, mendietara eta urruneko haranetara joaten ziren.

Baina Jesusi basamortuan jarraitzeko gonbita denentzat da. Monjeek eta ermitauk basamortuko gune bat aukeratu zuten; guk, gutxienez, basamortuko aldi bat aukeratu behar dugu. Basamortuko denbora bat pasatzeak esan nahi du gure inguruan hutsune eta isiltasun pixka bat egitea, gure bihotzaren bidea berriro aurkitzea, zalapartatik eta kanpoko premietatik ihes egitea, gure izatearen iturri sakonenekin harremanetan jartzeko.

Ondo bizi izan da, arima garbitzeko sendagai moduko bat da Garizuma. Izan ere, karbono oxidoaren kutsadura ez ezik, kutsadura akustikoa eta argi-kutsadura ere badago. Denok gaude jaleoz eta kanpokotasunez beterik. Gizakiak eguzki-sistemaren periferiara bidaltzen ditu zundak, baina gehienetan ez daki bere bihotzean zer dagoen. Ihes egitea, entretenitzea, dibertitzea: bere baitatik ateratzea, errealitatek ihes egitea adierazten duten hitzak dira. «Ihes-ikuskizunak» daude (telebistak aspertu arte ematen ditu), «ihes-literatura». Modu esanguratsuan, fikzioa deitzen zaie. Fikzioan bizitzea nahiago dugu errealitatean bizitzea baino. Gaur egun asko hitz egiten da «estralurtarrez», geu gara, errealitatek ateratzen garenak, kanpotik beste batzuk etorri beharrik gabe.

Gazteak babestu behar ditugu eragin horietatik. Faraioak ere, Israeldarrek Moisesi entzun eta askatasun gosea izan ez zezaten honela agintzen zuen «ezar iezaiezue lan astunagoa eta beude lanpeturik, eta ez diezaietela kontu horiei jaramonik egin» (*Ir* 5, 9). Gaurko «faraioiek», isilago baino indartsu, honako hau diote: «Gazte hauengan zalaparta areagotu dadila, zorabiatu daitezela, ez pentsa, ez erabaki beren kabuz, baizik eta moda jarrai dezatela, guk nahi duguna eros dezatela, guk esaten ditugun produktuak kontsumitu ditzatela».

Zer egin? Basamortura joan ezin garenez, basamortu pixka bat egin behar da gure barruan. Asisko San Frantziskok iradokizun praktiko bat egin digu. «Beti dugu ermita bat gurekin; han eta hemen gabiltzala nahi dugun bakoitzean sar gaitzke barruan. Gure gorputza da basamortua eta bihotza ermita». Eremu «eramangarri» honetan, inork ikusi gabe sar gaitzke, jendez betetako autobus batean goazen bitartean ere. Dena da «nork bere baitan murgiltzen» jakitea.

Jesus basamortura bultzatu zuen espirituak geure baitara ere eraman gaitzala, gaizkiaren aurkako borrokan parte harturik Pazkoa ospatzeko presta gaitzen!

Jainkoaren herriaren otoitza

Senide maiteok egiogun otoitz zeruko Aitari, gizaki guztientzat errukia eta bekatariontzat barkamena eskatuz:

Erantzuna: Kyrie, eleison!

Ky-ri- e, Ky-ri- e, e - lei-son! Ky-ri- e, Ky -ri- e, e - lei - son!

- Garizumaldi honetan, Jainkoak bere fededunei gaitzaren aurka egiteko, bere okerretatik zuzentzeko eta onbidera itzultzeko behar duten indarra eman diezaien. Egigun otoitz. R/.
- Ondasunez oparo bizi direnek, daukatena behartsuen onerako erabiltzen jakin dezaten, eta mundu honetako ondasunetan liluratuta bizi ez daitezen. Egigun otoitz. R/.
- Gure eskandalu eta epeltasunengatik Elizatik urrundu direnak Jainkoaren familiara itzul daitezen eta Jainkoak geure jarrera horien bekatua barka diezagun. Egigun otoitz. R/.
- Garizumako penitentziaren bidez gure bihotzak, berriz ere, Jainkoaren hitzak fruitu oparoa emango duen lur emankorra izan daitezen. Egigun otoitz. R/.

Errukitsua eta eraman handikoa zaren Jainko Jauna, historiaren aldi ezberdinetan Zure ituna berritzen duzu belaunaldi guztietako gizakiekin; entzun gure erreguak eta prestatu gure bihotzak Zure Seme maiteari entzuteko, penitentziazko egun hauen bidez bihotzaren egiatzko berritzea iritsi eta Zurekin dugun ituna berri dezagun. Jesu Kristo gure Jaunaren bitartez.

Prefazioa

Garizumako I. igandeak bere prefazioa du, Meza liburuko 158. orrialdean.

Jaunartze-ondorengo otoitza

**Hartu dugun ogi santu honek, Jauna,
sinesmena bizkortzen digu,
itxaropena sendotzen eta maitasuna indartzen;
egizu, ikas dezagula
egiazko ogi bizia den Jesusen gose izaten
eta zure ahotik ateratzen diren hitzetan bizia aurkitzen.
Jesu Kristo gure Jaunaren bitartez.**

Herriaren gaineko otoitza eta bedeinkapena

Jauna zuekin. R/. Eta zure espirituarekin.

Makur zaitezte, Jaunaren bedeinkapena hartzeko.

(Eskuak herriaren gain zabalik bedeinkapena esango du:)

**Etor bedi, Jauna, ugari zure bedeinkapena
zure herriaren gainera;**

**emaiozu estualdietan itxaropen handiagoa,
tentaldian indar sendoagoa eta betiko salbamera.**

Jesu Kristo gure Jaunaren bitartez. R/. Amen.

Bedeinka zaitzate! Jaingo ahalguztidunak:

Aitak, eta Semeak, + eta Espiritu Santuak. R/. Amen.

Zoazte Jaunaren bakean. R/. Eskerrak Jainkoari.

Herriaren gaineko otoitzaren ordean, erabil daitezke Bedeinkapen Nagusia (Ikus Liburuxka honetan 4. or.).